

Poldi Timotidok pepa mindan youliminguk

Yodakale Mede

Pepa yonj adi Poldi Timoti netok mindan youliminguk. Pepa yendok maanen adi Poldi Timoti ne nindokoonj, niŋkilitiŋa tubulodaune adi titiŋ momoonj tiŋa nadisukiliti gineŋ fafaŋeŋ yali Kilisto Jesu'walaŋ Mede Momoonj yohautadok yonja youliminguk. Tiŋa undugonj mede kahat hogohi meeniŋ nadisukilitihik tubukadakainj undihidok magi kametnadi mu tuluwaak yonja nihep tuguk. Adi toboniŋ Pol ne titiŋ momohi dedinj tuguk unakonj Timotidibo takaliŋa titiŋdok yonja youliminguk. Titiŋ momohi wonjadi indinj. Nadisukiliti gineŋ fafaŋeŋ yayat, welekulema gineŋ hatihati, meeniŋ noli yabukahile-kahile eŋ malabumun beembeem.

Yokahanj

1 ¹ Nu Pol, nu Kilisto Jesu'walaŋ aposel. Bepaŋ ne'walaŋ nadinadide aposel mintaanj, metam Kilisto Jesu nadisukilitimiŋa hatihati kahiledok yofolok tuguk u yenihautadok nehitubu-dakaleeŋ naninjkukuk. ² Timoti, du mihine hinek, nu welenedi gabukahile tilat doktiŋa pepa i youkamulat. Baŋ Bepaŋ tiŋa Wapumnik Kilisto Jesu adi'walaŋ silonj tobogonj, eŋ nadikulema, eŋ kulemadi du'walaŋkade haliwoonj hatuwaak.

Timoti nadisukilitiŋiŋ fafaŋewekdok niŋkilitiguk

³ Batne papaneye adi welehiŋ walihi hatiŋila Bepaŋ'walaŋ kwanai tigiŋ. Kaŋ nu maanj titiŋ undinonj tiŋa yomnit mokit hatiŋila Bepaŋ'walaŋ kwanai tilatdi niutumbaanj helemahemaŋ haniŋ be tebele ninadi tilat indigonj tuwot du maanj nadisugamulat. ⁴ Nutok tiŋa bulanonj nadiŋa dautilitilik tugunj wendoktiŋa nu kotigonj buŋa gabudok hinek nadilat. Undunj tiŋa kadem nadifo hinek tibaat. ⁵ Tiŋa nadisukiliti foloonj hakamulak wendok maanj nadisulat, nadisukiliti wonj adi mamage Lois tiŋa manje Yunis'walaŋ hakukdi du'walaŋkade meŋeŋa buguk hatak u aganj nadilat. ⁶ Kaŋ nu wendegonj nadisugamuŋa

ganiŋkaikalat. Nu kohone kige foloŋ kamewene Bepaŋdi kahaŋŋiŋ siloŋ tigamguk u tubukokomeune kudup wele daŋewek. ⁷Du agaŋ nadilaŋ, Bepaŋdi Munabuli nimguk u munabuli munta diniŋ moŋ. Munabuli woŋ adi saŋiniŋ nimdok eŋ nihitubu-lodaune me noli welenikdi yabukahilekahiledok eŋ nihitubu-lodaune hatihatiniŋ momooŋgoŋ hinek kadokodok wendok nimguk.

Fafaŋe tiŋa Bepaŋ'walaŋ Mede Momooŋ kamehatidok

⁸Unduŋ doktiŋa du Wapumnik'walaŋ medeŋiŋ yohautadok meka adi mu tuluwaaŋ. Tiŋa undugoŋ nu yot fafaŋeniŋ gineŋ hatat wondoktiŋa meka mu tibaaŋ. Nu adi Wapumdok tiŋa yot fafaŋeniŋneŋ hatat. Ale du Bepaŋ'walaŋ saŋiniŋ beŋa, nukut Mede Momooŋ yoyo kwanaidok malabumuŋ hekiyademeet. ⁹Bepaŋdi agaŋ kotigoŋ ninigikuk, tiŋa ne'walaŋ metamŋiye uŋgoŋiŋ hatidok yoŋa kutiniŋiŋguk. Adi inde nemek titiŋ momooŋ niŋ tugumun doktiŋa mu kutiniŋiŋguk. Mokoŋ. Koomkwaha hinek, Bepaŋdi nemek nemu yehitubu-mintaŋila ne'walaŋ nadinadiŋiŋde kutiniŋiŋguk. Ala siloŋ tobogoŋ Kilisto Jesu'walaŋ hatak u nimaŋa netok metamŋiye hinek nibukahileguk. ¹⁰Kaŋ folooŋ adi nai kobuk i Tubulodanik Kilisto Jesu founa uŋaniŋ mintadakaleguk. Kilisto Jesudi kumuŋ diniŋ saŋiniŋ tubudapmahinakaŋ, Mede Momooŋŋiŋ gineŋ hatihati dapmandapmaŋnit mokit u tubuhautaune metam feedi kadakalegiŋ.

¹¹Kaŋ nu wendok Mede Momooŋ yoyo titiŋdok eŋ aposelŋiŋ hatiŋa yenindidime kwanai tibit yoŋa nehitubu-dakaleeŋ naniŋkukuk. ¹²Unduŋ doktiŋa nu malabumuŋ u hekilat. Iŋgoŋ oŋ, nu wendoktiŋa meka mu tilat. Mokoŋ. Nu me nadisukilitimilat u agaŋ nadimilat. Tiŋa undugoŋ kwanai kohone foloŋ kameguk u ne kedem kaulidokowaak, kaŋ wendi helemahemaŋ momooŋ hali ulune Kilisto'walaŋ nai wapum u mintawaak.

¹³Mede momohi dibek ganiŋgut u momooŋgoŋ hinek nadiŋa, tali wendok tuwolit hinek yehikeleeŋ mede yohautaaŋ metam yeniyehitubu-didimewaaŋ, woŋ adi Kilisto Jesu nadisukilitimiŋa welesiloŋ timiŋa unduŋ tibaaŋ. ¹⁴Bepaŋdi Mede Momooŋ u kadokoweŋ yoŋa kohoge foloŋ kameguk, woŋ adi nemek momooŋ hinek, ale momooŋgoŋ hinek kadokoluwaaŋ. Kaŋ Uŋgoŋiŋ Munabuli welenik maaneŋ hatilak adi kwanai u kedem gehitubu-lodawaak.

Poldi Onesifolasdok welemomooŋ nadiguk

¹⁵Esiya kwetneŋ me hogohogok agaŋ binabugiŋ u agaŋ nadiguŋ, eŋ Fisela tiŋa Hemoseni adi maŋaŋ agaŋ binabugumuk. ¹⁶Nu Wapumdi Onesifolas tiŋa wapmihiŋiŋ-tam welekulema tubumintayembek yoŋa ninadilat. Nai fee hinek Onesifolas adi welenadifo tubumintanamuluguk.

Enj yot fafaŋeniŋneŋ halene wendok meka mu tuluguk. Mokoŋ.
 17Adi Loma iŋoŋ busuwaanŋ nehitubu-mintadok fafaŋe kwanai hinek
 tuguk, titauyeŋ kougoŋ nehitubu-mintaguk. 18Wapum ne nadiune
 yodapmandapmanŋ nai wapum foloŋ Wapum'walaŋkade welekulema
 tubumintawaak. Tiŋa undugoŋ, Onesifolas adi Efeso uŋoŋ nehitubu-
 lodadok kwanai fee hinek tuguk u da-ku aganŋ nadilaŋ.

Wapum'walaŋ mikme momooŋ hatidok

2 1O mihine, Timoti, du helemahemaŋ Kilisto Jesu'walaŋ siloŋ
 tobogoŋ u kahileune wendi gehitubu-fafaŋeluwaak. 2Kaŋ mede
 hogohogok metam namandahik foloŋ yohautawene nadiguoŋ u yadi metam
 mede yoŋa undugoŋ hinek keleŋ enj Bepaŋ'walaŋ mede boifaŋeŋ hatiŋ
 undihidok yenimbune adibo metam noli maanŋ kedem yenindidimeyaneenŋ.

3Du adi Kilisto Jesu'walaŋ mikmeŋiŋ momooŋ hinek hatiŋa me
 noli malabumuŋ hekiyam indut kwanai wendoktiŋa malabumuŋ
 hekiluwaanŋ. 4Du mikme heki'walaŋ titiŋhik aganŋ nadilaŋ. Adi mikme
 diniŋ kwanai tiŋila nehitok dinina kwanai be kwanai noli maanŋ mu
 moŋgola kwanaineiŋ. Mokoŋ. Adi yadi me wapumhikdi kwanaihik u
 kanadiune utumba titiŋdok nadiŋa mikme kwanai hogok momooŋ tiŋiŋ.
 5Kaŋ me kiyane tiŋiŋ adi yadi kiyane titiŋ diniŋ yodoko u takaliŋiŋ, enj u
 mu takaliŋa adi fek gineŋ wosuwaanŋ nemek folooŋ moŋgokiŋiŋ u tuwot
 mu moŋgotnetiŋit. 6Me diniyeti kwanai fafaŋe tiŋa tiŋiŋ heki adi nanaŋe
 folooŋ koom mintalak u nehi naune tuwot tibek. 7Nu mede i ganilat
 yendok nadinadi kwanai tibeŋ, kaŋ Wapumdi nadinadige tubutombek
 kaŋ mede hogohogok yendiniŋ mebi u kedem nadidakaleweŋ.

Gweheye mu titiŋdok

8Du adi helemahemaŋ Jesu Kilistodok nadimiluwaanŋ. Adi yadi
 Dewit'walaŋ yalakiŋiŋdi kumuŋ gineniŋ kaikaanŋ pilakuk. Nu Mede
 Momooŋ unduŋ uŋakoŋ yohautalat. 9Kaŋ metamdi wendogoŋ tiŋa nabiŋ
 kaŋ nu me hogoli unduŋ tilat, unduŋ doktiŋa malabumuŋ mebimebi
 namuŋa yot fafaŋeniŋ gineŋ napmeiŋ. Ingoŋ Bepaŋ'walaŋ medeniŋ
 adi tuwot mu folokeneŋ youkilitibune halek. 10Wendoktiŋa nu fafaŋeŋ
 welene tubukilitiŋa malabumuŋ hogohogok u hekilat. Unduŋ tiŋa
 Bepaŋdi metam netok yabukahileguk u yehitubu-lodalat. Kaŋ adi maanŋ
 hatihati Jesu Kilisto'walaŋ hatak u kahileeŋ hauta holiholiŋeniŋ gineŋ
 uŋoŋ dapmandapmanŋnit mokit hatineeŋ.

11Mede indiŋ hatak u biyagoŋ hinek:

“Indi biyagoŋ hinek adut kumuŋgumun kaŋ undugoŋ biyagoŋ hinek
 adut kaipmuŋ hatineem.

12 “Indi malabumuŋ hogohogok u nadikabeleeŋ gicine tiŋa adut
 fafaŋeŋ hatineem adi Jesudut mapme kwanai noŋgoŋ tineem.

“Ej indi adi sigilulum timine nibuņa adi maņņ sigilulum tinimbaak.
 13 “Indi adi takalidok yofolok tiņa medenik u mu tagimneņj tineem,
 iņņņ adi yadi medeņņj yoguk u tagimnelak.
 “Adi ne’niņ medeņņj u tubutakaleeņ undubo yooņ undubo yooņ mu
 tilak.”

Bepaņ’walaņ mede didimeņņņ yohautaluwaañ

14 Du helemahelmaņ metam mede i nadinadihik gineņ kotigoņ tubukaikayemuluwaañ. Tiņa nemek kuyahi fiili wendok tosiwe mu titiņdok mede fafaņņņ Bepaņ dawineņ yeniluwaañ. U nemek folooņnit mokit, doktiņa metam nediyeņ mede u nadiiņ adi yadi yehitubu-kadaka tilak. 15 Du yadi kwanai-me folooņ hinek mintadok kwanai fafaņe tiņa tuluwaañ. Unduņ tubune Bepaņdi kwanaige u kaņ nadiune utumba tuluwaak. Kaņ du Bepaņ’walaņ medeņņj biyagoņ eņ folooņ hinek u didimeņņņ yohautaluwaañ, unduņ tiņa adi dawī foloņ meka mu tibaañ. 16 Mede fifit Bepaņ’walaņ nadinadiņiņdi mu takalilak, mede fiili undihi adi sigilulum tiyemdok. Mede undihidi metam gicineņ yahaņeune kadakanij fuliņņ tiņa Bepaņ sigilulum timindok tali gineņ wiij. 17 Mede undihi adi wede daunģimiņdi metam yehitubu-kadaka tiij wendok tuwolit, adi wapum hinek mintawetik. Me mede undihi yoyo tamuk meyat lufom, Haimeniya tiņa Failita. 18 Adi indij yonila mede biyagoņ eņ folooņ hinek diniņ tali bikabamuk, “Indi kumuņ ginenij kotigoņ kaikaañ pilapilat u agaņ pilakumun.” Mede wendi metam noli nadisukilitihik tubukadakalak. 19 Ijgoņ Bepaņdi taka kobumuņ wenedahiguk u fafaņeņj yatak, kaņ wendok foloņ mede youkudip indij hatak: “Wapum adi ne’niņ metamņje u agaņ yabunadihinakayemilak.” Tiņa youkudip noli maņņņ indij hatak: “Metam hogohogok Wapum wou kamehatiij adi yadi titiņ kadakahi u sigilulum tiyemaneņ.”

Welenik walaniņņ hatiņa Bepaņ’walaņ kwanai kede m taneem

20 Yot wapum niņ gineņ maliņ ikiij u gol tiņa silwadi tutumbagiņ hogokdi mu ikiij. Mokoņ.^a Bemdi be kwetdi tutumbagiņ u maņņ ikiij. Ala noli nai uņņoniņ dokooņņ mintalakneņ beņa kwanainedok eņ noli adi kwanai fifit noli mintalak undineņ beņa kwanainedok. 21 Unduņ doktiņa nediyeņdi hatihatiniņ gineņ titiņ kadakahi tumolokudapmaañ Bepaņ dawineņ uņņoniņ mintawaak, adi yadi maliņ uņņoniņ kwanai dokooņņ tiij wondok tuwolit mintawaak. Tiņa Bepaņ’walaņ mehinek mintaaņ Wapumņij tubulodawaak. Unduņ tiņa kwanai-mebimebi momohi u titiņdok woom tuluwaak.

^a 2:20 Maliņ yolak woņ adi maliņdok hogok mu yolak. Nemek noli, kabot, ime utnaņ, ime kabot heki wondok yolak.

Sadaŋ'walaŋ tikamanda yabudakaleeŋ yalakapmedok

²²Unduŋ doktiŋa du helemahelman metam kuya'walaŋ welehiŋ gineŋ nadigalika kadakahi hogohogok mintalak undihi u sigilulum tubudapmaluwaan. Unduŋ tiŋa du adi titiŋ didimeniŋ eŋ Bepaŋ nadisukilitimindok titiŋ eŋ me noli yabukahilekahile diniŋ titiŋ eŋ welekulema diniŋ titiŋ undihi adi kedem yabukahileluwaan. Da tiŋa me noli nediyer Bepaŋ namanda foloŋ uŋgoniŋ hinek hatiŋila Wapum wou gineŋ wo-tubudulaan mulelem timiŋa ninadi tiŋ, hidi hogohogok wanakaŋdi titiŋ u taneer.

²³Tiŋa undugon, du adi me nadinadihik hogohi heki'walaŋ mede kaulehi nadidakalenit mokit, undihidok magi kametnadi adi mu tuluwaan. Mede undihidi tosiwe eŋ tokwihita tubumintaŋ, u daku agaŋ nadilaŋ. ²⁴Tiŋa Wapum'walaŋ kwanai-me adi mede tosiwe be tokwihita mu titiŋdok. Mokoŋ. Adi yadi metam hogohogok titiŋ kulemanŋon tiyemdok. Eŋ me niŋdi foko timimbune kaŋ adi toboniŋ welekulema timiluwaak. Unduŋ tiŋa metam hogohogok Bepaŋ'walaŋ talik didimeniŋ yenindidimeluwaak. ²⁵Adi yadi me mede wobu tiŋ heki'walaŋ nadinadihik u baigon kwanaineer tubudidimeluwaak. Unduŋ nobu tubune Bepaŋdi yehitubu-lodaune welehiŋ tubutakaleer mede folooŋ, biyagon hinek wendok nadinadi kwanai kedem binek tineer. ²⁶Sadaŋ'walaŋ medeniŋ takalidok yoŋa agaŋ begerŋiŋdi yohoneguk. Ingon on, adi mede biyagon eŋ folooŋ hinek u nadiune nadinadihik kotigon dakaleune Sadaŋ'walaŋ beger u kwihililiwenekula kedem hatineer.

Nai wapum dulaune metam feedi titiŋ kadakahi kisaŋ tineer

3 ¹Du adi indiŋ nadiwer; nai dapmawene tulune kadakaniŋdi fee hinek mintaan ulihakawaak. ²Eŋ metamdi nehitok nadinadi hogok hatineer, tiŋa muneerŋnit hogok hatidok nadinadihik wapum halaak, eŋ nehi wohik yotiloŋ foko tineer, eŋ tokwihita tiŋa me nolidik medehaki yenineer. Eŋ mehim-behiye'walaŋ mede wobu tiyemneer, eŋ metam titiŋ momohi tiyemneer hekidok yeniutumba tuwot mu tineer. Eŋ Bepaŋ'walaŋ titiŋ hogohogok u sigilulum tineer. ³Tiŋa undugon me nolidut menot titiŋdok mu nadineer, eŋ adi kwihita tubune yeniŋkulemadok talik nemu mintawaak. Adi yadi me noli yenimpek it tineer. Tiŋa undugon foloohik diniŋ nadigalika mu kadokoneer, unduŋ tiŋa mik tiŋa metam hogok yehitubu-kadakafit tiyauneer. Eŋ titiŋ didimehi hogohogok u mik tiyemneer. ⁴Adi yadi me noli nehi'walahi u yeniŋkamanda tiŋa kadakaniŋ tiyemneer, unduŋ tiŋa pilap hinek nehi'walaŋ nadinadihik hogohi nadidakalehinit mokit u yehikeleneer. Tiŋa nehitok nadiune nehi adi me wapuhi hinek tibaak. Unduŋ tiŋa titiŋ

mebimebi nadifonit kwetfoloŋ iŋoŋ hatak wendok nadigalika tiŋa Bepaŋ kahile mu tineeŋ. ⁵Tiŋa adi yadi Bepaŋ'walaŋ titiŋ u sigihikdi hogok tineeŋ, iŋgoŋ Bepaŋ'walaŋ titiŋ folooŋ hinek saŋiniŋ wapumnit hatak u yadi nemu kabe nadineeŋ. Du adi me undihi biyabuŋa kwatnaŋgoŋ hatiluwaanŋ.

⁶Mewoi undihi adi tamwoi nadinadihik gweheyeŋi'walaŋ yohineŋ kabukabup yofofonŋ tiyawooŋ nehitoŋ nadiyembune utumba titiŋdok yeniŋgatagataye tiŋ. Tamwoi woŋ adi kadakanihik doktiŋa nadimalabuda tiŋ. Kaŋ welehikdi pilali titiŋ wou wou mebinit mokit u titiŋdok yehimanelak. ⁷Tamwoi woŋ adi nadinadi folooŋ nadidakaledok nadiŋa helemahemaŋ nadinadi kwanai tiŋ, iŋgoŋ Bepaŋ'walaŋ mede biyagoŋ eŋ folooŋ hinek uyadi tuwot mu nadiŋ. ⁸Koom Yanis dut Yambilis adi Moses mik timiŋgumuk.^b Undugoŋ hinek me titiŋ undihi tiŋ adi yadi mede biyagoŋ eŋ folooŋ hinekdok mik timiŋ. Tiŋa nadinadihik giyondadapmaune Bepaŋ nadisukiliti hinek mu timiŋ. ⁹Iŋgoŋ titiŋhik yendi wapum hinek mu mintawaak. Mokoŋ. Metam hogohogokdi titiŋhik kaulehi u agaŋ yabukiyondaneeŋ. Koom Yanis gut Yambilis'walaŋ maanŋ undugoŋ mintaguk.

Metam hogohogok nadisukiliti tiŋ adi malabumuŋ hekineeŋ

¹⁰Iŋgoŋ du adi nukut hatiŋa titiŋne Bepaŋdi titiŋ dedinŋ titiŋdok nadilak u metam yeniyehitubu-didimegut u agaŋ nadiŋa kelelaŋ. Eŋ yauyaune diniŋ mebi maanŋ agaŋ nadilaŋ, eŋ titiŋne diniŋ mebi hogohogok wanakaŋ hinek nadihinakalaŋ. Nu Bepaŋ nadisukiliti hinek timilat, eŋ helemahemaŋ welene tubufafaŋeŋ kwanai tilat, eŋ me noli yabukahileeŋ fafaŋe tiŋa hatiŋa malabumuŋ beemulat u du agaŋ nadilaŋ. ¹¹Metamdi titiŋ kadakahi hogohogok tinamgiŋ be malabumuŋ hogohogok Antiyok, Aikoniam eŋ Listala uŋoŋ hekigut u du agaŋ nadilaŋ. Du nemek hogohi hinek yokwet wapuhineŋ uŋoŋ tinamgiŋ u agaŋ nadilaŋ. Iŋgoŋ Wapumdi malabuhi hogohogok wendiniŋ maaneŋ nehitubu-lodaune kedem hakut. ¹²Biyagoŋ hinek, metam hogohogok nediyeŋ Kilisto Jesudut wooŋ galiŋa Bepaŋ'walaŋ titiŋ takaliŋ, adi yadi metamdi malabumuŋ yemiŋ. ¹³Kaŋ me kadakahi eŋ yalaŋ-me hekidi metam tikamanda tiyemneeŋ. Kaŋ Sadaŋdi nehinile tikamanda tiyembune titiŋhikdi kadakahinakawaak.

Poldi Timoti niŋkilitiguk

¹⁴Iŋgoŋ du adi mede dibek nadiguŋ u nadiŋa nadisukiliti fafaŋelaŋ uŋakoŋ honefafaŋewaŋ. Metam nediyeŋdi mede u ganiŋgehitubu-didimegumun u da-ku agaŋ nadinimhinakalaŋ. ¹⁵Tiŋa undugoŋ,

^b 3:8 Adi'walaŋ kahat u Kisim Bek 7:11, 22 gineŋ kunatnadidok.

du koom kuyanij gineŋgoŋ duŋgoŋ hatiŋila Bepaŋ'walaŋ Youkudip Mede kunatnaditabulaŋ. Youkudip Mede wendi Bepaŋ'walaŋ nadinadi fuliŋgoŋ gambune du Kilisto Jesu nadisukilitimbune Bepaŋdi kotigoŋ ganagilaak. ¹⁶Bepaŋ'walaŋ Munabuli negoŋ mede hogohogok Bepaŋ'walaŋ Youkudip Mede gineŋ hadapmaiŋ u yotubumintaguk. Kaŋ mede woŋ adi mede biyagoŋ eŋ folooŋ hinek u nininihitubu-didimedok mede fofooŋ, eŋ metam nadinadihik didimehi moŋ u yehitubu-didimedok, eŋ hatihatiniŋ tubudidimedok, eŋ Bepaŋ namanda foloŋ titiŋ didimehi u nininihitubu-didimedok. ¹⁷Wendoktiŋa mede yendi Bepaŋ'walaŋ memetam nihitubu-lodaune titiŋ momohi hogohogok u behinakayam, tiŋa undugoŋ nihitubu-lodaune kwanai hogohogok momohi u titiŋdok tiulidoko tiŋila hatiyam.

Didimeniŋgoŋ hatiŋa Bepaŋ'walaŋ mede yohautadok

4 ¹Kilisto Jesu adi hatigene Mapme Wapum saŋiniŋnit busuwaan kaipmuŋ hatiyam be agaŋ kumuŋgiŋ indi'walaŋ mede yodapmandapmaŋ kwanai tibaak, nu adi'walaŋ namanda foloŋ be Bepaŋ'walaŋ namanda foloŋ indiiŋ ganiŋfafaŋewene nadiweŋ: ²Du adi Adi'walaŋ medeŋiŋ u fafaŋe tiŋa yohautaluwaan. Metamdi mede nadidok tiulidoko taneenbe, be mu taneen, iŋgoŋ fiit du adi helemahemaŋ fafaŋe kwanai tiŋa Kilisto'walaŋ medeŋiŋ yohautaluwaan. Du weleyouyout tiyemiŋa yehitubu-kaikaune wele tubutakale tiŋa Bepaŋ'walaŋ titiŋŋiŋ takalidok adi mede saŋiniŋnit hinek yeniluwaan. Unduŋ tiŋa helemahemaŋ kulemaŋgoŋ tiyemiŋa Bepaŋdi titiŋ dediiŋ titiŋdok nadilak u momooŋgoŋ hinek yeniyehitubu-didimeluwaan. ³Hatigene nai niŋ mintawaakneŋ metamdi mede didimehi u nadidok moŋ nadineen. Adi toboniŋ mede fifit noli nadidok gigne tiŋa magi kametnadi tineen. Unduŋ tiŋa metam fee yeniyehimaneune buŋa mede adi nadidok gigne tiŋa unak yenimbune nadineen. ⁴Unduŋ tubune adi mede biyagoŋ, folooŋ hinek u sigilulum timiŋa kahat fifit folooŋhinit mokit wendok magi kametnadi tineen. ⁵Iŋgoŋ da adi helemahemaŋ nadidakalenit hatiluwaan. Hatiŋila malabumuŋ eŋ folofigita hekiluwaan. Tiŋa undugoŋ du Jesu'walaŋ Mede Momooŋ saŋiniŋnit yoŋa weleyouyout tiyembune welehiŋ tubutakaleyaneen.^c

Pol kumundok naiŋiŋ dulaguk

⁶Nu nai muniniŋ kumumbene naŋgatnedi wain ime Bepaŋdok dumuŋ kwatnemiŋ unduŋ kwatnedok agaŋ nai tilak. ⁷Nu hatihatidok kwanai gineŋ uŋoŋ kiyane momooŋ hinek fafaŋeŋ kiyaneŋgut. Ala ya agaŋ fek gineŋ busuwalat, eŋ nadisukilitine Bepaŋ'walaŋkade maŋ fafaŋeŋgoŋ

^c 4:5 Kwanai woŋ adi ewengelis kwanai.

hinek honefafaŋegut. ⁸Kaŋ yoŋ adi agaŋ metam kiyaneen fek gineŋ wosuwaan tuwaŋiŋ bein u agaŋ woomnamulak. Tuwaŋiŋ u ye indin, Wapumdi me didimenin nanimbaak. Wapum adi titin didimenin takalinŋ memetam'walaŋ titin hik kameka tilak, ala nai wapum mede nadinadinin nai folon tuwaŋiŋ u nambaak. U yadi nu hogok mu nambaak. Mokoŋ. Metam hogohogok nediyen di Wapum Jesu minŋon mintadakaleune kakan dok nadigalika tinŋa woom-hatiin aditok maanŋon yembaak.

Poldi Timoti pilap buŋa kakan dok ninŋuk

⁹Du debedebe k tinŋa pilap hinek buŋa nabaan. ¹⁰Dima adi nemenemek kwetfolon hatak yendok nadigalika tinŋa binabuŋa Tesalonaika yokwet wapumneŋ uguk. En Kelesen adiyen Galesiyade uguk, kaŋ Taitus adi Dalimatiya kwetneŋ uguk. ¹¹Kaŋ Luk kubuŋon di hogok nukut hakamut. Unduŋ doktinŋa Mak nagilune dukut noŋon budemeek. Kaŋ adi nehitubulodaan kwanai inon kedem tidemeet. ¹²En Tikikus adi agaŋ kamewene Efesode uguk.

¹³Ala bene kaŋ dahidahine wahinin kweheyenin Tolowa yokwet wapumneŋ me Kapas yolineŋ itak u maan tinŋa baan, en pepa bilibethinit maan moŋgolaan. Tiyaugene pepa bilibethinit kale gitnemdi tutumbagin u biyabuŋa baanŋen alaka, naditomuŋa u maan moŋgola baan.

¹⁴Me Alesanda adi aindi nemenemek tutumbatutumba tilak, adi kadakanin fee hinek tinamguk, wendoktinŋa hatigene Wapumdibo titin wondinin kibikon tuwolit hinek kougon tubu-udanemimbaak. ¹⁵Medenikdok adi mik hinek timinŋuk, undunen ala kanadinila hatibaan.

¹⁶Timentimen hinek mede gineŋ yali mede tubu-udanegut, nai unanin nebek nin di medene u kasop nemu tinŋa yoguk. Mokoŋ. Metam hogohogok adi binabudapman tigin. Nu Bepan di yomhik u biyembek yoŋa ninadilat. ¹⁷Ingon Bepanŋe sigiyakadi tinamuŋa saŋinin namguk. Unduŋ doktinŋa nu Mede Momoon u yohinakaan yogut. Kaŋ Bepan'walaŋ metam hinek mu hatigin adi maan wanakan hinek nadigin. Unduŋ tinŋa Bepan di kale laion manin ginenin kotigon nanagikuk. ¹⁸Wendok tuwot Wapum ne kadakanin hogohogok tinamne tin ginenin kotigon nanagilaak. Unduŋ tinŋa nehitubulodaune kedem halene nanagilune wooŋ hatihati kobuli heber gineŋ hatakneŋ unon napmewaak wendoktinŋa wou indin nintilolat: Adi'walaŋkade hauta filimpipitnit u dapmandapman nit mokit haliwooŋ halaak. U biyagon.

¹⁹Nu Piliska tinŋa Akwila en Onesifolas'walaŋ yolineŋ metambop itowin aditok youtumbane mede kameyemilat, u maan yenimbune nadineen. ²⁰Elasto adi Kolin yokwet wapumneŋ ungon hatilak. Kaŋ Tolofimo adi yagit tuguk kaŋ Mailitas yokwet wapumneŋ ungon

^d 4:13 Pepa bilibetnit adi indihidok yoŋin.

bikabuŋa bugut. ²¹Tiyauge hatilune fifiŋgobut gut sububa nai tibaakneŋ ala, debedebek tiŋa pilap hinek baan. Yubilas eŋ Pudens eŋ Lainas tiŋa Kalaudiya tiŋa undugoŋ kayoŋbop nokeye adi wanakan hogohogokdi youtumba mede i kamegamiin.

²²Wapumdi munabulige dut hatiluwaak. Eŋ siloŋ tobogoŋŋiŋdi hidigut halek.